

摘藻堂四庫全書薈要

集部

欽定四庫全書薈要卷一萬八千四百四十八

集部

御選元詩卷三十六

五言律詩三

虞集

林臯亭

九月天氣肅鶴鳴在林陰使君甚好客來者總能吟紅
樹秋山近黃花夕露深鄰翁八九十有酒即相尋

題子昂長江疊嶂圖

昔者長江險能生白髮哀百年經濟盡一日畫圖開僧
寺依稀在漁舟浩蕩回蕭條數根樹時有海潮來

送先隴二鄰僧還吳

蘭若背山陰松筠夾徑深門閑容虎卧湖近聽龍吟雨
過泉添澗風飄磬出林衲衣皆舊識一一謝幽岑
東嶮憶招提幽尋日未西過山隨虎跡倚石待猿啼雲
外催歸錫松間覓舊題卜隣吾欲老毋惜伴扶藜

次韻阿榮存初叅議秋夜見寄

寓館城門夕高秋雨露開天垂華蓋近月轉紫垣來疎
闊思良會淹留到不才深期謝安石揮麈散風埃

雪谷早行

積雪擁柴門行人稍出村溪頭或遇虎木末不聞猿接
棧迴山閣支橋就樹根驅車上重坂回首見朝暾

雪巖樓觀

高閣丹青起中天紫翠分窓當太白雪門俯九疑雲伐
木山人去吹簫帝子聞塵中歸未得春思轉紛紛

送人之劔閣倅

往年登劔閣快馬著春衫設險懷前賦摩崖覓舊劉鄉
人遊雪界郡倅試冰銜歸道觀新政春江不挂帆

寄子山尚書

竹色侵衣碧重簾雨氣深白鶩翻墨沼紫燕入書林北
海春尊側西山夕閣陰東曹公事少歌舞散黃金

漫興

雨閣添衣潤風簾隱几高白頭更事少病日向書勞南

客傳音信東家問酒醪江邊茅屋破歸楫若為操

送張尚德并序

史館薦張尚德為檢閱官朝廷以為宜稱可其請
未奏也有司以闕簿注新進士尚德頗有聞即斂
裳宵逝噫進退若是可以知史館之薦人矣予力
雖不足以留之亦終不敢失之也故作是詩以餞
之

六月初聞雨官河潦水生江南歸宋玉稷下謝荀卿鵬

鶚青霄迴薰葭白露盈都留詩興在來聽上林鶯

寄丁卯進士薩都拉天錫

鎮江錄
事宣差

江上新詩好亦知公事閑投壺深竹裏繫馬古松間
夜月多臨海秋風或在山玉堂蕭爽地思爾珮珊珊

送長沙守

白髮長沙守循良又好文近辭金馬去遠有玉魚分
對竹聽湘雨開簾看嶽雲漢廷思賈誼一飯莫忘君

送趙編修祀西嶽江瀆

西道祠官去東風入旆斜
汾陰已歸雁江水正飛花
歲事聞宜穀鄉人喜過家
老來思故里欲寄使君車

代衆仲作

昔在泉州住將軍每見招
春雲山對屋夜雨水平橋
池鴨穿荷葉溪魚上柳條
禁城鐘鼓起車馬晚蕭蕭

送王照磨之官雲南

遺廟珍珠浦歸舟熨道溪
飛鳶愁暑雨走馬畏山泥
官署尊丹鷺祠官勝碧雞
題詩遠相送紅日五雲西

玉堂燕集圖

朝廷多暇日別館又青春
薄醉猶催酒清歌況有人
玉堂金硯匣翠袖白綸巾
老去渾無賴憑誰為寫真

畫檜

茅山多古樹此檜更長生
鸛鶴棲來穩蛟龍化得成
雲深還近戶月落似聞笙
千載如相見蒼然故舊情

贈楊友直

雒陽楊友直字儼漢中郎
畫若錐穿石垂如雨漏牆舞

花羞女美醉草笑僧狂昨日鴻都學煩君寫數行

題朱邸竹木

江上復春雨曾陰覆碧波石高龍影卧林迴鶴聲過解
珮猗蘭浦揚旂落木坡佳人翠袖薄日暮欲如何

赤壁圖

過鶴生新夢攜魚憶舊遊清霜凋木葉落月湧江流隱
者時堪訪良田亦易求如何玉堂夜白髮不勝愁

八月八日有感題視草堂壁

載筆趨芸閣探囊索縕袍坐銷秋日淨心折夜風高識
字頭先白謀生計轉勞文園多病渴常想賜蒲萄

賦程氏竹雨山房

春雨過山竹幽泉繞舍鳴燕泥書帙晚魚浪釣絲晴奉
席從孫子連床總弟兄舊聞林下叟讀易到天明
遊子聞春雨思親望故園竹間開几席花底注山尊累
世書連屋頻年稻滿村卜鄰淳朴地絕學欲重論

戲作試問堂前石

試問堂前石來今幾十年
衰顏空雨雪幽致自風煙
微醉寒堪倚孤吟靜更眠
舊湖春水長誰繫釣魚船

為問堂前石何年別太湖
春風神不王夜月影長孤
不中明堂柱空餘艮嶽圖
頗思嘉種木歲晚與相扶

為問堂前石何無藤蔓纏
金蓮疑可致紫菊若為妍
舊夢遺波浪閑情閱歲年
祇緣相識久親為濯清泉

碣石久淪海女媧曾補天
乾坤遺藁爾霧雨護蒼然
淬劍龍隨化彎弓虎自全
昔賢多賦此誰賦最流傳

為問堂前石屢逢堂上人遠來嗟最久獨立與誰鄰
運載勞車馬摩挲識鳳麟鑿車書吉日追琢到嶙峋

代石荅五首

幸自鄰頑鄙毋煩問歲年當寒金作礪向暖玉生煙
眉黛無歸意毛羣有叱眠涼州三百斛亦未酌觥船
昔觀一柱觀還渡幾重湖雪盡身還瘦雲生勢不孤
研穿鄴臺瓦賦就草堂圖芝閣元雲在危蹤敢藉扶
牛角何堪礪蝸涎謾自纏沈冥辟邪古羞澀望夫妍
神

物須清鑒靈根屬小年金輿曾共侍千載憶甘泉
轉徙寧論地存留亦信天露盤危欲折劫火不同然
雄下殘經斷岐陽數鼓全向無文字托寂莫竟誰傳
去歲留詩別嗟哉白髮人冠依子夏製居切左丘鄰
執篇充振鷺修辭綴獲麟終須愁坎壈勿用諛嶙峋

送魯子翬廉使之漢中

封上頌臺禮輕車入漢中節毛吹渭雨木葉動秦風
把酒臺基古馳書歲事豐朝回倚西閣日日數歸鴻

立春夜試墨

輕雪作春花飛來入鬢斜紫貂迎曉霧絳蠟炫晴霞書
詔頻趨閣思歸即借車幾時將穉子隨意踏江沙

次韻筠軒司徒足成旦公所藏英宗御題之句
元題曰日光照吾民月色清我心又題琴曰至
治之音二首

化國多長日高人侍紫宸觀書從上相屬筆念生民雲
漢文章備風雷號令新惟應青簡在能載古風淳

御翰龍池曉繡經
鷺殿陰雲依清靜
葉月印妙明心千
載堂堂去諸天肅肅臨朱絃
誰為鼓至治有遺音

玉隆宮所藏宋乾道宸翰雲壑二字

昔者雲歸壑天章自九重
日華常映鳳山氣盡成龍
俯仰遺陳迹高深儼德容
飄然化春雨結想在高松

寄忽承旨

投老清江外依山結數椽
扶藜循水竹把筆賦雲煙
歲熟無憂食秋清不礙眠
故人相望遠北極在天邊

題朱澤民山水

積雪山陰道嵯峨筆底生雲門見童子禹穴閱蛟精高
卧人何在幽情幾詠成杜陵空想像晚飯施樓晴

寄題汪道士草亭

飛白妙娉婷新題照草亭仙遺相鶴法客借換我鶯經霧
雨歸懸黍風雲護伏苓遙知春晝永深坐養黃庭

聞雁

樓近煖雲濕夜深聞雁低聲音燈外盡羽翮月邊迷冉

冉白榆上悠悠黃竹西應逢穆王駿春草一長嘶

錢舜舉畫

一樹花如雪清明客未歸坐看黃鳥並夢作綵雲飛翠
袖寒猶薄羊車過絕稀相如能作賦月下卷春衣

題馬竹所畫

老樹依江岸歸舟傍釣竿水花看晚淨風葉識天寒雁
字來千里魚羹付一餐遠山青可隱日下是長安

送客北門晨登山木閣

晨登山木閣零雨煖于春溪水解留客梅花偏照人秣
香知酒熟市遠覺民淳此地堪娛老惟愁度水頻

次韻馬伯庸少監四首

仍歲從巡幸山川識重臨講幃來濟濟馳道止駸駸五
月衣裘薄諸生坐席深歸耕何待老莫問二疏金
移蹕宮城曙煙花繞閣重來王俱屬籍稱使不傳烽賜
席還親問囊書更手封恐煩宣室召眊日轉蒼龍
臣甫多愁思長歌拜杜鵑鑿崖通閣道積水放樓船惆

悵霜橫野棲遲雪滿顛
經行看宿草碧色自年年
太平知永日漸老惜芳辰
論說慙孤學推揚負相臣
退思常感慨拜賜每逡巡
郊藪多閑地餘生托鳳麟

奉別阿爾輝東泉學士遊甌越

憶昔同經幄春明下玉除
挂冠俄去國連舸總盛書
筍脯嘗紅稻蓴羹斫白魚
莫言江海遠咫尺玉堂廬

次韻葉賓月山居十首

錄四首

冰泮溪流碧雲生島嶼紅
輕陰殘夢裏遠樹亂愁中
鷗

外兼晴絮鶯邊共晚風地偏山氣近霏靄濕房櫳
露冷天光逼溪澄夜影圓水花含窈窕山吹總清縣為
覓洪崖侶重尋赤壁船翻愁孤鶴外迴互萬山連
綠瑣依松潤湘簾亂蘚斑吹笙花下散飛燕雨中還有
客歸謀酒無言卧看山春禽忽相喚深樹兩闌關
風日宜芳歲煙霞樂燕居坐深閑看奕燭冷靜修書臘
醞紅生玉春盤綠間蔬但須門有客不問食無魚

酬崔御史送熊掌

熊掌來東國分甘到老夫鸞刀寒斷節翠釜煖柔膚兔
脫中山醯魚藏丙穴腴藜腸渾未厭玉食恐時須

楊載

次韻韶卿壬寅元日又三日聞游人頗盛之作
堂堂宵雨過栗栗曉寒仍獻歲人同得東郊事復興杜
門疑我拙有句愛君能且驗臨堦草從今日漸增

寄劉師魯

想君遊宦處正值洞庭湖落日波濤壯晴天島嶼孤舟

航通漢沔風物覽衡巫天下文章弊非君孰起予

贈吾子行

春雨連城闊春雲映戶多長衢方淖寧小水亦風波抱
獨能如此思君可若何便當乘興去著屣一相過

東陽十題

錄六首

焦桐

只作全生計唯存半死心芻蕘猶不置斤斧重相尋遂
使焦釜誰為愛古琴有材不足恃愁絕念知音

蠹簡

往古韋編在何年始汗青蠹蟲深卜宅科斗少成形泯
滅阡秦火搜羅出漢廷斯文未喪不敢望金經

塵鏡

收藏無寶匣歎息網絲懸孰使明為暗如觀醜勝妍玉
臺終寂寂金雀尚翩翩政訝開元日虛將盛事傳

廢檠

二尺書檠在如今久棄捐魚膏雖有焰蠹簡獨無緣牆

下偕遺礫窓間帶舊煙却觀提挈處辛苦悔當年

敗裘

寂莫牛衣子能無敝緼袍塵埃須浣濯蟣蝨費爬搔
意味存鷄肋寒涼視馬毛千金既銷鑠猶聽朔風號

卧鐘

漢殿經焚後喁然卧草中雕幾牙板廢鏽澀土花蒙
追蠡難陳力華鯨不奏功待賢初設簾想見古人風

送屠存博

君往金陵郡於予亦有聞海環平野盡山出大江分未
召元司馬誰憐鄭廣文自今師道立章薦必紛紛

渡江寄俞仲連

舟濟大江濱中流日欲曛鹵翻沙際雪潮落渡頭雲鯨
躍常知候鴻飛不亂羣頗思論勝概把酒莫如君

奉題伯父雙峰樵隱四首

山出雙峯秀溪流一派清土風存禮讓人事省將迎路
逐高低過田隨早晚耕家林有如此南望每關情

石樹盤根瘦沙溪激浪清竹間看犢卧木末見人行
稽事常分力樵歌輒和聲從來攜杖處不礙白雲生

山曲兩三家相過路不賒對門開竹徑臨水種梅花
酒熟留人醉詩成任客誇時時談舊事相看鬢垂華

草滿三春綠山留萬古青呼兒欣解意應俗憚勞形
採菌敲寒木收魚照夜汀祇應老崖谷東帶尚論經

送方韶父先輩遊五湖

蕭蕭垂素髮渺渺泛滄波過眼江山好離家日月多
詩

名終不朽世事復如何一往五湖上蒼茫問釣蓑

和張仲實之吳興舟行雜詠

水程通百里雲樹隔千層鶴髮歡相見龍門羨獨登
文辭毋乃壯栢杓尚能勝仰止情何極吾為附驥蠅

寄題羅氏別業

門前臨白徑長日少人行野樹重重暗溪流脈脈清
山形元不斷雲氣自相縈已似龐公隱何時重入城

次韻江行四首

錄三首

潮頭終歲白沙腹有時瞞利涉他州柁終更古戍戈天
依臨海樹風作滿江波亦有投竿意還聽孺子歌

藜羹真我食薜荔亦吾衣養性隨時足全生徇物非秋
蓬猶未定風樹莫相違謾作煙霞想曾無羽翼飛

路僻行來好天清望極遐白魚翻急浪黃犢卧晴沙柳
吐千條葉梅殘幾樹花佳辰從此數歷歷看韶華

送孫大方歸朝元宮

高卧林泉表超然謝世紛空山鳴白雨古石繫蒼雲不

作夔龍伍甘從鹿豕羣都門遊宦客回首總慚君
為樓因地勢四面盡青山路落秋城外河流曉樹間鴈
飛雲漠漠龍現雨珊珊建木光華盛何時共折攀

題信州先天觀圖

高林褰翠氣虛谷散虹光道士多騎虎仙人自牧羊澗
泉通地遠山嶺際天長戴子文為記流傳示不忘
四圍山不斷狀若碧芙蓉谷遠含風細崖深下露濃茂
林藏虎豹陰洞伏蛟龍恍惚神人降浮空羽蓋重

次韻引浚儀公題蘭竹卷子

樹蕙連叢竹，祇應族類同。
相依巖石畔，併入畫圖中。
勁葉凝清露，危梢倚碧空。
諒非高世士，此意固難通。

惠崇古木寒鴉

江上秋雲薄，寒鴉散亂飛。
未明常競噪，向晚復爭歸。
似怯霜威重，仍嫌樹影稀。
老僧修止觀，寫物固精微。

送林季羽入京宿衛

青雲自致身，磊落見斯人。
卷袞辭蒼麓，垂纓侍紫宸。
漏

殘珠閣曉香煖玉爐春儻厭承明事歸來衣錦新
終軍方近幸賈誼最能文獨用奇才進應將美譽分金
鞍光照地寶劒氣凌雲來往燕臺下同遊必羨君

送徐義父入京

幽燕向日邊裘馬去翩翩磧迴沙如雪河窮浪入天上
書雙闕下待詔五門前壯節多奇遇無煩愧往賢

中秋

攬雲憑結構步月上林皋不記金尊竭頻瞻玉宇高神

清存夜氣天闊數秋毫百尺樓如在何煩卧汝曹

送王元禮歸平城

燕趙多奇士遺風有固然射雕猶絕藝屠狗亦名賢形
勢威天下風流號北邊送君歸此地亦欲奮吾鞭

題青田葉叔至野清堂

為堂殊軒敞在野興尤濃白水流千折青山繞百重樹
麻行旆旆蒔木倚童童相對漁樵話終朝亦罕逢

送張宣撫使嶺南

奉使入蠻煙終軍始妙年抗旌辭朔野擊楫渡湘川翠
竹侵巖際黃茅盡海邊狼荒非善地為戒莫留連

送李侍郎使安南

九秋天色晚萬里送君行馬首塞雲起腰間寶劍橫奉
揚天子命慰荅遠人情直渡蠻江水炎氛一日清

送吳清叔

驛路程雖遠帆風勢甚遒青山隨岸去白水滿江流牢
落添新恨繁華憶舊遊只今歸去好把釣即槎頭

冬至次張宣撫韻

北去關河遠南歸歲月長
屠龍雖有技相馬獨無方
雲水連天暗霜蕪滿地荒
客遊應未已塵土在衣裳
瀛海無消息冥冥鳥道長
已經雙鬢短更待兩瞳方
落日依平嶂洪河入大荒
憂來那可得揮淚欲沾裳

酬吾子行

耿耿思朋舊悠悠涉歲華
既依秦大姓方問魯東家
雅道將誰與新詩敢自誇
祇今能會合不憚路途賒

范梈

蘄州城下晚泊與土人語及西方事平有喜而
作

野闊秋無際
天空夕始涼
漁船下浦急
畚火入雲長
洲遠懷鸚鵡
山危指鳳凰
戍人新斂甲
垂老幸時康

百丈山中夜坐聞謹思將還憶甲寅入南中正
此日也十二月二十三日

近得雷州信遙聞弟姪來江山淹遠望天地保疏才鄉

為魚羹起今寧馬豆猜殘年有心事未定著寒灰
欲雪翻成雨何天恰吝晴似緣春在近故與月爭明
樹行行暝川雲冉冉輕往年當此夕孤棹適南征
斜谷驚風合空階墜溜鳴燈昏時作暈漏遠不傳更
但得林間趣何須谷口名是誰超物外不用計浮生
客行身萬里家在地中分爵命優臣子江湖遠聖君
夜瞻龍鳳氣歲出虎狼羣舊故無消息低回瘴海雲

壬戌秋錄囚晚行寧州道中追錄

曉發高平鎮前旌路未分小橋煙外過流水月中聞虎
豹宜多隱豺狼不可羣居人敵炎暑報有竹連雲

引兒灣晚泊

席壓波心正舟移岸脚斜夕陽明細霧秋樹擁荒葭問
道獨如夢懷京却勝家客愁不自整更苦暮啼鴉

九日諸生攜酒至城東看菊

楚楚臨階菊重陽特地開慰人良有意報汝媿無才
杵聞雞發鄰觴送蟹來采英吾欲寄悵望倚江臺

晚過孔奉常舍下

滄江一萬里書信近如何向暮客懷薄及秋鄉夢多故人相慰藉竝舍數經過但願長無事彤庭接珮珂

贈別李教授亭赴五羊先往餘饒覲省

行色動西風鄉心去住同諸生五嶺外之子大江東且羨還家鶴無愁度海鴻若逢天上使書記莫怱怱

登南城樓

樓倚晴空外登臨延賞心微風孤雁過落日萬蟬吟客

路侵齊樹鄉愁接楚砧為詢宮外筑流水似哀琴

寒食後百丈山夜坐

已新寒食火更近暮天鐘花片隨風減柴扉帶月重以
閑酬官達將病抵心慵本不從耕稼臨江愧老農

快閣延望

快閣延江望清尊息坐彈風雞猶戒曙雲雁每辭寒莫
使晨歌廢聊思飽食安百年會有故終不媿儒冠

題秋山圖

我愛秋景好自緣秋氣清江空石露骨木落風無聲偶
向畫中見猶如雲外行祗疑豺與虎無地得縱橫

貴州

離思久不愜幽情晚旋添天宜明月獨山與宿雲無蛩
語通支柱蛛絲映卷簾若無光霽在何以破朱炎

發橫浦之永淳縣

急漿開蜃漲孤尊已夕陽水光排峽靜洲勢背城長太
史才無敵將軍義不忘感傷今歲月淹泊愧滄浪

題吳生雨吟圖還寄清江皮野

江雨四時昏故人家遠村如何一見面還又兩忘言老
樹經鮫淚空花斷雁魂由來前輩畫妙手出吳門

東齋秋雨後花藥俱有生意

田園雖尚遠未肯效淒涼藥就籬成蔓花因徑作行豈
惟延晚趣自足信年芳頗敬鄰人婦驅雞不過牆

晚興

古寺山重掩平田縣對門鷓鴣藏白晝蟋蟀破黃昏貝

賈多通市諸偷每近村殷勤省風俗慷慨動心魂

晚上南山觀燒

渡口尚寥闌夕暉生翠屏隨風初繞電翳霧忽如星鳥
獸蒸宜遁柴扉照不扃閩都春始過雨洗合重青

京下思歸

黃落薊門秋飄飄在遠游不眠聞戍鼓多病憶歸舟甘
雨從昏過繁星達曙流鄉逢徐孺子萬口薄南州

期出東郊不果却率便河閘橋詣張道人菴尋

故舊作

却欲東郊去還尋北渚來江翻垂木動風過雜花迴
道迷朱轂虛空見紫臺世氛渾不奈憶得是蓬萊

和李溉之園居雜詠四首

書劍上青霄鄉關雨雪遙年華侵水竹客思墮山苗
會想商巖綺將從鄭里橋文詞誠小伎祇比俗情饒
豈是幽棲地飛騰亦未量城根分鼠壤池面合魚梁
名久喧郎署歌時感女桑畏卿音調苦疇復貴相忘

圃色依簾障天光切戶庭草生連夜雨花落徧池星未
遂翔寥廓真堪托晦冥逢時須紫燕得意拂青萍

丹柰花初結朱櫻子半成寢興因物變筋力與年增燕
拂承塵去蜂隨曳杖行玉泉幾千仞好在翠如傾

種瓠二首

并引

或言種瓠蔓長必翦其標乃實予齋所種因樹為
架蔓緣不已果多虛花欲去之慮傷其凌霄之意
因賦五言為之解嘲云

豈是階庭物支離亦是奇已殊凡草蔓綴得好花枝帶
雨寧無實凌霄必有為啾啾羣鳥雀從汝踏多時

秋後瓠果成一實輪囷可愛余嘉其晚成而不羣
荅賦云

嘉瓠吾所愛孤高更可人不虛種植意終繫發生神有
葉誠藏用無容豈識真明年應見汝衆子亦輪囷

盧師東谷懷城中諸友

契闊遽如許淹留空復情天遙一鶴上山合百蟲鳴異

俗嗟何適冥棲得此生平居二三子今夜隔重城

離席合賦贈南劔教授盛復之之官

首路向朱夏出關猶到官麥收風漲暑梅熟雨留寒氣
候隨方異才名自古難豈容賢若爾教授老江干

遣懷

柳影侵門暗桃枝亞竹高年深詩竝進春在酒爭豪吏
隱嗟何擇行藏信所遭斯文如未喪端合付吾曹

即事

隨地居能勝因人景倍饒折風疎菡萏移雨近芭蕉放
浪明高蹈留連近久要虛心待世慮已任過雲飄

六月初十夜雨止玩月有感

雨歇青林迴虛齋生夕涼簾帷方度月枕簟已懷霜地
角家何在雲端路轉長慈幃近安否歸覲不能忘

王武子相馬圖

偶然來廐吏喚作九方臯毀譽依名立周旋逐物勞神
馳風電足眼冷雪霜毛事有遭逢者騏驎固自高

八月十五夜

城上初聞柝，天邊獨倚樓。
可憐今夜月，還照異鄉秋。
燭暗頻移席，簾虛不上鉤。
回文錦機字，寫得大刀頭。

風雨

風雨忽如此，空山方晝眠。
故應為計拙，可復要人憐。
燈火鄉村路，桑麻杜曲田。
悠悠今視昔，把卷一茫然。

揭傒斯

黃尊師高軒觀鵞因留宿

開軒南嶽下世事未曾聞落葉常疑雨方池半是雲偶
尋騎鶴侶來此看鵝羣一夜潺湲裏秋光得細分

衡山縣曉渡

古縣依江次輕輿落岸隈鳥衝行客過山向野船開近
嶽皆雲氣中流忽雨來何時還到此明月照沿洄

以事暫如武昌發臨川

江轉欲無路山迴忽似圍客程秋共遠物色晚多疑稍
沙鷗集匆匆野樹稀武昌今夜夢定有故人知

南康夜泊聞廬阜鐘聲

廬山三百寺何處扣層雲宿鳥月中起歸人湖上聞
空應更迴近瀑正難分遙想諸僧定香爐上夕熏

山莊晚立有懷舍姪沆督穫臨川

簌簌黃桑葉蒼蒼白竹峯居人爭野碓歸客背村鐘
路暗緣溪溼山寒著霧濃阿咸收稻未辛苦闕相從

泊安慶時再北遊

夜泊淮西郡寒生客子衣酒家臨岸閑野燒映江飛雲

盡月初出潮平風漸微前年城下路此際正南歸

史館獨坐

地夏天逾近風高午尚寒虛庭松子落敔檻菊花乾
撫卷俱千古憂時有萬端寂寥麟父筆才薄欲辭官

山水圖

幽人無世事高卧謝浮名山崦晴時出溪流盡處行還
聞有漁釣相問扣柴荆不埽門前路莓苔滿地生

寄題胡氏園趣亭

日與世情遠學人聊治生畦蔬多品類樹果各生成
野老過偏數山禽近不驚詩書吾所好農圃也須明

歸舟

汀洲春草徧風雨獨歸時大舸中流下青山兩岸移
鴉啼木郎廟人際水神祠波浪爭掀舞艱難久自知

送譚仲章歸長沙

君家雲陽下忽向雲陽歸行路有南北看山無是非
三湘迴雁盡孤劒白虹飛亦欲投簪去從君採蕨薇

桃花鸚鵡

嶺外經年別花前得意飛客來呼每慣主愛食偏肥才
子憐紅脣佳人學綠衣狸奴亦可怕莫自戀芳菲

送鄉人祐上人從師歸當陽

學道玉泉寺從師天子都流年春事半歸路客帆孤山
勢遙連蜀江聲不入吳故園如可到種芋有遺區

題俞氏看雨軒

慘澹來何處崩騰忽滿城遙憐四山黑近灑半江明可

愛花間溼偏宜竹上聲中宵未可住高枕寄餘情

飲張氏別墅

楚國多才俊張家好弟兄出門湖水碧留客野堂清微
雨鳴疎竹寒煙覆古城園人隔畦語歲暮此中行

不寐呈何太虛

隙月斜依壁窻風細著人飄零知命晚牢落夢家頻斷
雁何曾定鳴雞不肯晨何郎詩句好萬里獨相親

趙道士山水圖

悄愴寒山曉淒迷野水昏長橋通古寺小艇背衡門路
盡雙松上雲生亂石根如行南嶽暮遙見祝融尊

送人之淮東

扁舟何處客此地飽經過彭澤江聲合揚州月色多天
低知近海地闊欲橫河自是吾生拙如君定若何

登薊丘作

閑登薊丘望西北削諸峯轉覺天地肅因悲霜露濃雲
間何處笛日落滿城鐘自笑栖遲者惟堪學老農

題先天觀圖

聞說先天觀重重絕壁環鳥啼青嶂裏花落白雲間
樵子能長嘯居人識大還洞門無處認唯有水潺湲

和傅與礪

近日何多念頻年不肯還河流無故道春色是他山
槎几看雲凭衡門罷月闌無情寒與暑偏解鑄衰顏

出三洪峽

積水羣山裏行舟亂石間地偏疑隔世峽怒欲藏關
獨

鳥啼深樹斜陽下急灘千憂逢一快未覺此生辱

大駕既還獨候驛傳未得和陳真人見示

供奉關山遠淹留日月長鄉書迷楚越鄰笛亂伊涼秋
水流成字晴雲去作行寸心懸帳殿應似雁隨陽

黃潛

寄方韶父先生

牢落江南賦知音寄渺茫鹿麋行處有芝草夢中香遙
興滄溟閩愁歌白髮長平生今古淚滴破綠蘿裳

雨

兀坐九十日雨聲殊未收
花時翻益睡茅屋不禁愁
生事吾何望春寒晚故留
江波青滿眼萬里付雙鷗

泥潦今如此出門知路難
蓬蒿春自長桃李夢曾看
未覺龍公倦誰憐燕子寒
青燈耿蕭瑟千載入憂端

寄友人

憐君山水意局促守柴扉
故里悲秋草涼風滿褐衣
滄洲斜日晚白社幾人歸
寂寞分遙念天寒木葉稀

秋懷

天末雲猶去山中歲欲徂周流吾道在歎息古人無
野鵲疑秋樹新駒怯暝途蒼茫念同志微薄忝為儒
稍稍秋河落娟娟宿露微天清江不息野迴樹相依
回首狂歌數驚心昨夢非流螢無思極巧入絳帷飛

憑軒

信有儒冠誤憑軒意欲迷山深風雨惡天闊羽毛低
他日開炎瘴連城送鼓鼙荷戈吾媿爾未敢歎塗泥

山中懷友

卓犖恒山秀相逢幾抱琴五年風雨別四海弟兄心雪
外梅花遠山中桂樹深定知嵇叔夜高興薄雲林

題剡溪張氏書樓

木杪出飛樓仙山在上頭可能無客至小為借書留芸
草春仍長虹光夜不收何時試乘興一棹剡中舟

送鉅上人遊廬山

廬阜西江上秋風道路賒泉飛青玉峽池浸白蓮花此

去聊乘興何時定到家憑高莫回首悞指赤城霞

社日重過方子踐

東風吹客衣長憶見君時一別驚雲散重來與燕期春
深今夕雨花老去年枝莫待空山裏青燈有所思

聞子踐卧疾

吾子仍多病何人共解顏水聲和藥臼春色閉松關積
雨連三月懷人劇萬山同遊況零落浩蕩可追攀

過謝臯羽墓

識子今無日風流可復尋山林餘楚製弟子解閩音滄
海他年夢青天後夜心平生匣中劍零落遂如今

八詠樓

懷古荒碑在登樓晚望賒秋陰垂野薄江勢抱城斜天
地悲遊子冰霜感歲華紅塵吹短褐歸興及清笳

明月樓

遺堞何年有飛甍壓上頭鼓鼙分上幕香火望靈湫曲
岸舟如失遙沙樹欲浮登臨且吾土未敢恨淹留

杭州寄子踐

樽酒何人共春光著處同乾坤容野馬歲月失飛鴻俗
眼能無白風花故自紅向來常處士早已負諸公

次韻答子踐

不謂飛霞佩珊珊寂莫濱相看今夕雨漸近長年人往
事驚如夢何峯擬卜鄰平生千里駕還往不辭頻

陪仇仁父先生登石頭城

談笑逢諸老登臨失故亭薄遊成汗漫高步覺玲峴峽

水通吳白淮山入楚青平生一杯酒及此慰飄零

抱琴

三尺枯桐樹相隨年歲深此行端有意何處託知音
隱青山夜寥寥太古心空攜水仙曲更向海中岑

送陳養直歸四明

迢迢浙河水同渡不同歸執袂方成別驚帆已若飛
野橋行處酒風雪去時衣瞻望嗟何及天長鴻雁微

送趙宗吉御史

憶共趨龍禁驚聞正多冠汗顏居館下矯首望雲端去
路黃河直飛霜白日寒仙舟如可到歸理釣魚竿

初至海寧二首

地至東南盡城孤邑屢遷行山雲作路累石海為田蜃
炭村村白梭林樹樹圓桃源名更美何處有神仙
縹緲蛟龍宅風雷隔杳冥人家多面水島嶼若浮萍煮
海鹽煙黑淘沙鐵氣腥停驂方問俗漁唱起前汀

過永康桃巖

立石平如削飛雲近可梯莫窮千古勝但惜衆山低靈
草經春長珍禽隔樹啼人言舊朝士感事有留題

五月廿日

不擬夫容佩終焉挂寂寥百年多事始千里一身遙巢
燕驚華屋鞦鵲望碧霄蒼蒼叢桂樹愁絕小山招

含香道中

殘日亭猶遠風輕帽易斜稻畦低沒鶴草徑曲行蛇經
世知無策謀生會有涯殷勤理黃菊留眼待秋花

柳貫

同楊仲禮和袁集賢上都詩十首

出塞行瞻日趨朝喜近天
離宮開苑囿馳道絕風煙
瑤水巡非遠峒山歷更懸
甘泉多法從獻賦憶當年

雨水漸衣黑雲砂際日黃煙
開纔黯慘日出已蒼涼
徇俗高簷帽清心小篆香
端居萬里念蕙草惜微芳

昔建窠中業初開徼外山
雉城平兀兀沙水淨灣灣
朱夏宸游正清秋武衛閑
叨陪文學乘空媿髭毛斑

謠俗隨方異溝塗隔舍迷
熏人惟馬湏勸客有馳蹄
殿角孤花靚城隅雜樹低
天涯中夜舞如意昔曾攜

天潢猶白白雲幕故青青
積潦摧車軸高風墮箭翎
宮塗丹赭堊殿戶紫金釘
女樂蓬萊祕哀簫動杳冥

幄殿層雲障轅門積雪峯
竒鷹皆戴角御馬盡飛龍
瀚海將臨幸云亭望陟封
青丘大羽獵有事待元冬

曹務惟章句官規自法程
齋扉侵雨潤宴几得風清
歷歷三刀夢行行萬里城
明年遂耕隱深仗酒為名

經游還絕塞際遇復清朝大暑無蒙綸輕寒已御貂盤
空虀屢薦觴至酒頻澆貧病諳為客何慚帶減腰

公子青絲轡王孫綠幘車宴酣風小定舞罷日西斜手
擲宮中果神行海上查築郿母自厚儉德不期奢

水草方方善弓弧戶戶便合圍連婦女從戎到曾玄雪
毳千家帳冰瓢百眼泉浚稽山更北長望斗光懸

送李文晦僉事易節燕南二首

北候催乘傳東人挽去轅不觀滄海小安識太行尊好

爵隨年進初心與道存老儒當劇部煩護國西門
鵬鶚三秋擊騏驎萬里行官聯漢直指經術魯諸生世
或深求法公惟不近名天心與民監上一昭明

送朱本初法師赴豫章玉隆宮

鎖蛟惟有柱墮鼠已無家想到真仙宅能回俗士車露
壇春翦柏雲白夜敲茶人境今雙絕長吟採物華

初夏齋中雜題三首

壤隔溪流斷門依野次成初非慵應接自是寡將迎筍

蕨搜山得鹽醢入市營貧居薄滋味盤膾敢求精
經月始一出移時還小勞生涯依馬磨力作問蠶繰藤
刺青陰密楸花紫艷高雨晴看爛漫草徑莫令蕻
池岸方如截池波深可洄出門歌小海見客思滄洲魚
沫吹還息蛛絲斷忽抽萬生同一馬敢望絕轅轡

二月七日與陳新甫甘允從飲范使君亭

心賞他年屢湖光此處全春生鷗鳥外人醉杏花前細
竹侵除道殘陽滿繫船毋將比西子吾實媿華顛

睡餘偶題二首

此世何多幸予生厚自憐簡書方厲禁裘葛屢催年正
是穉能熟其如橘不遷摧藏南郭隱放浪北窓眠
惜此珊瑚玦栖之薜荔牀青山圍坐密白日放歌長客
久違朝籍人誰問夕郎駕車容一駟何必更留良

十六夜重對月

白兔不擣藥病衰將奈何酒嫌他日少月似昨宵多寡
鶴無誰和新鴻亦未過兒童解娛老舞影屢傿傿

題離騷九歌圖

紫貝東皇席青霓北斗旗
究觀神保意遑恤放臣悲
有客傳巴舞何人執籥吹
楚巫千載恨憑向畫中窺

御選元詩卷三十六

謹案卷三十六第十頁前行阿爾輝舊作阿魯

庚今改

謹案卷三十五第九頁後七行故未及之刊本末
訛未據袁桷清容居士集改

第十九頁後三行田父分雞桀鄰僧乞鶴籠按馬
祖常石田集桀作柵乞作與今仍刊本

第二十三頁前七行夢斷三年容刊本三訛一據
貢奎雲林集改

卷三十六第二頁前八行塵中歸未得刊本塵訛
城據虞集道園學古錄改

第二十四頁後三行回文錦機字刊本錦機作機
錦據范梈德機集改



總校官庶吉士臣侍

朝

校對官檢討臣蕭九成

謄錄監生臣周元

欽定四庫全書薈要

集部

御選元詩卷三十七

詳校官原任事

臣

李斯咏



欽定四庫全書薈要卷一萬八千四百四十九

集部

御選元詩卷三十七

五言律詩四

吳萊

吉祥寺

一昔逢寒食行吟採物華
風聲敲檻竹雨濕墮船花
曲塢青龍樹長灘白鷺沙
回看江上水直去到吾家

吳師道

送友人

秋風吹古道木葉墮征衣
明月今宵缺孤雲何處飛
關山行路惡文字賞音稀
莫待相思劇天寒早賦歸

春日雜詠

二月忽將半一春能幾時
寒隨鴻雁別雨起杏花期
江水碧于酒山雲白似炊
登樓思無限孤客在天涯

送人北歸

被褐南州客依先北府居
起辭從事辟歸讀古人書
暮

雨江雲溼春風汴柳疎他年有來雁毋惜問何如

題官舍壁

官舍千峯裏迎秋氣已清池煙明鶴影林雨斷蟬聲紅
惜芙蓉落青憐薜荔生今朝少公事吟嘯且怡情

中秋泊淮安望張仲舉助教不至

中秋淮浦夜誰共好懷開看月坐復坐可人來不來獨
謠慚短思多病負深杯想見蕪城路吹簫擁醉回

江山秋色圖

江南何處景一幅淡含暉草木半黃落樓臺深翠微橋
連秋水渡船與暮雲歸我亦漁樵客悵然思拂衣

陳泰

馬頭館居

入夏樓偏迴推窗揖遠山柳煙籠岸碧梅雨著衣斑喬
木年年異幽齋日日閑風流無復見坐待暮鴉還

僧房

僧房吟坐久孤枕已中宵燈盡寒侵幌梅香夢過橋江

湖殘夢逼風雪故山遙明日又行役天涯影寂寥

宋裝

同十七弟訓南城訪友不遇且聞將有金陵之行

芳徑暴橋西徘徊白板扉家人出簾語小李掉鞭歸榆
莢晴將老楊花晚漸稀仍聞欲南棹情思愈依依

城南道院作

六月二十八日

三徑草纖纖苔痕過雨黏風光殊不惡涼意復相兼芍

藥斜侵城蒲桃亂入簷可憐成小憇不得遂幽潛

冬雨

十月楚天雨同雲暗八荒前山應是雪此地不成霜氣
混朝嵐重聲兼夜漏長閑庭斷來往幽思渺無方

枝江縣獨坐

按部
峽州

澤國持龍節蒙恩備使臣簡書時自理燈火夜相親山
雪迷殘臘溪梅借早春所憂無異政何以慰斯民

王士熙

題玩芳亭五首

每憶城南路曾來好畫亭
蘭花經雨白野竹入雲青
波影浮春砌山光撲晝扃
褰衣對蘿薜涼月照人醒

何處春來好城南尺五天地幽
迷曉樹花重壓春煙上
客拋羅袂佳人舞畫筵
晚來清興熟移坐曲池邊

留客青春過題詩碧霧寒
亂鶯穿舞障輕蝶立回闌
白日閑斟酒清時早挂冠
主人多雅興不覺玉卮乾

拂拭亭前石東風屋角生
淺雲浮水動遲日傍花明
春

去青林合人來白鳥迎暮塵回首處此地可忘情
美酒朝朝熟佳賓日日來玉卮擎雨露翠袖拂塵埃預
恐春城閉先教晚騎回只今行樂地飛去落莓苔

題幽居

最愛幽居好青山在屋邊竹窗留宿霧石檻接飛泉采
藥蟾奔月吹笙鶴上天世塗塵擾擾裁句詠神仙

李源道

虎丘

吳山名勝處獨說此林丘人去劒留迹僧來石點頭蘇
臺千古月蕭寺幾番秋巖壁寒泉響轆轤聲未休

王思誠

過襄垣縣

終歲行他縣何時到我州雲山從隱逸風月任攀留采
菊尋元亮鋤瓜問故侯泗濱亭子上閉戶著陽秋

趙子貞

風陵渡

一水分南北中原氣自全
雲山連晉壤煙樹入秦川
落日黃塵起晴沙白鳥眠
輓輸今正急忙殺渡頭船

塔布台

南禪寺

寶刹傳青梵雲霞作綺羅
山空雲氣合樹古雨聲多
好鳥啼青嶂飛花點綠莎
丹崖如有約吾亦訪盤阿

楊舟

天門十六峯詩

錄三首

玉堂峰

仙署何人到雲樓百仞高嘉名留此地登陟屬吾曹治
世多鳴鳳巍巍基跨巨鰲天顏常在目揮翰不辭勞

仙人峰

一自洪濛剖尋幽水石間琪花開滿樹白鶴過他山出
洞龍駒濕循阿鹿子斑逍遙太清裏冠珮倚巖關

仙源峰

靈泉響幽谷佳木蔭長春曾供胡麻飯不生羅襪塵龍

歸吟洞府魚盡媵波神手把芙蓉碧逍遙揖上真

葉謹翁

赤松山

井竈仙踪在林巒曙色分苔荒一徑雨松隱半峰雲啼
鵲催春事歸驂帶夕曛試呼王道士石几薦桐君

鹿田庵

憶昨招提宿空山日欲曛僧窗聽盡雨樵路踏翻雲秫
甕松華釀茶泉竹笕分因君成勝踐飛瀑夢中聞

方瀾

淵明

鄭聲與雅樂今我并無絃尚不歸蓮社誰能愛秫田青
山栗里宅白髮義熙年嵇阮能逃世終非出自然

金山寺

江心勝絕處人飲不知源楚浪夜喧寺浙山晴到門清
寒入僧夢太古結雲根欲問前朝事松風若有言

早秋夜坐

萬星都讓月勢不竝光芒塵陌聞鐘靜風庭灑頂涼明
河西落野飛露下霓裳但息人間累仙鄉不離房

秋夕有感

搖落秋漸晚露香籬下花疎鐘出煙寺新月入人家蛩
語日夜急雁飛天漢斜寒余不能去塵世事如麻

初冬作

沈寥蕭瑟後霽色却怡人霜已千林曙天猶十月春黃
花蝶過晚白葦雁銜新野性自夷曠非關絕世塵

春日遣懷

陸續畫船去曉風料理人泥香燕背草路煖馬啼塵海
色瞳矐日花光撩亂春浮生孰無事惜取自由身

過吳江

離離遠村落晴不見炊煙秋水漲無岸野舟撐入田天
留新稼穡人戀舊山川不待鴻飛定西風已肅然

石門曉行

風高木葉脫從此曉寒新積雨見初日遠山如故人煙

村一葦渡野寺數家鄰獨念行藏異沙鷗未我馴

元妙觀訪劉澹然

仙扉曉更寂香靄石狻猊日出松杉外風來殿角西簷
簷沐霧濕薜荔壓牆低林下非無趣浮生萬不齊

許謙

秋夜

日落窗仍暗鐙殘卷未收家人催杼柚穉子問更籌冷
露蟲傳夜悽風樹怯秋百年一瞬目萬慮幾搔頭

陳樵

送蒙古教授郭受益歸洛陽

足馬金華道西風過雁初
萼羹十里地菰米九秋餘
齊語傳聲澀巴童問字疎
湯湯清洛水舊學復何如

銀谷澗山房

樓臺依水石石樹帶疎篁
洞口有靈藥水西無夕陽
天花空處沒春草定中長
芳桂已飛盡有時聞妙香

送張仲舉歸晉陽舉進士二首

籍甚張公子詞華衆所推
門閭千里望天地一編詩
花落山公宅雲寒杵臼祠
看君歸晉日翻作別家時

挂帆謝公浦把酒闔閭城
江柳不忍折春風當別行
關雲連楚暗隴月向吳生
葉落長安道思君北問程

胡臧

秋晚崑館有懷兼嬰重役

葛衣秋未改日日任風吹
歸夢青山隔閒愁白髮知
枯槎印蝸篆病葉罍蟲絲
江上蘋花老何人寄所思

丁復

送秦元之赴太禧同僉

君家好兄弟聖主自知之周爵推秦仲虞官舉伯夷萬
方天浩蕩五采鳳歲蕤宣室虛前席蒼生屬論思

金陵送人還武昌

相送白鷺洲因思黃鶴樓遙觀禹土蹟重起禰生愁西
上不可得東關曾獨留江吞趙佗石歲月但空流

登高分得疊嶂

遠近不可數澹濃渾自成人煙諸崦隔鳥道半空橫日
夕黃微映江寒碧倒生憑高共臨眺憶得在宣城

送谷經歷之淮西憲幕

淝水綠逶迤淝山青陸離江天清共遠沙鳥白相宜百
鍊精金在孤忠聖主知幕蓮非久地臺栢有高枝

送賈西伯

西風苜蓿花南客又移家此道寧無用吾生未有涯峰
青宜霧日潮白逆江沙猶憶南樓夜吹簫度歲華

賦孺子亭送心上人還洪

東漢久無國南州猶有亭
虛楹過日白老樹入湖青
歲晚送僧去天寒行獨經
搔頭雙櫓側余髮故星星

送人省親

子仕親亦喜子歸親更懽
江湖片帆遠風雨一旆寒
沙鳥行秋渚江豚拜午湍
暮看松桂色容易厭時官

蘭堂上人之金陵因寄憲府張使君

初平牧羊處白石及秋登
挂錫月中到禪房雲上曾
使

君持玉節老客望金陵想見雙溪水先霜早已冰

王圭

和戴帥初陪廉憲副

勝迹三天洞清遊五字詩懸泉垂馬乳暗谷隱龍池坐
久禽聲集吟殘樹影移賢侯興不淺應有後來期

黃葉荒溪滿青蓮紺宇開闌干盤石樹方丈出氛埃洞
古遊人識巖高倦翼回祇應山下叟常說繡衣來

王璋

送高羅谷赴德安敬

水驛夜初寒風帆向德安青楓三楚路白首一儒官夢
澤尊前賦巫山雨外看未須嫌獨冷蘭菊政堪餐

次韻郭祥卿雪霽見懷

雪嶺留初日高齋照眼明禽聲交曉樹馬跡上春城有
客懷幽賞題詩問友生青鞵得來往更待數朝晴

約文甫不至用韻

俗裏眼能白懷中印未黃雙鳬離葉縣獨鶴下陵陽晚

歲故人少閒門秋草長知君非遠我自為困壺觴

汪鏊

曉發雲川

鐘絕棹歌發霜寒過雲川雲棲山頂寺月墜水中天宿
雁驚魚網啼鳥近客船舟人自相語滄海半成田

汪銖

九華道中

西風吹馬耳去去奈愁何一路人家少亂山秋色多荒

原巢虎穴壞壁網蛛窠搖落嗟時晚悲懷寄九歌

送巫一上人歸富川

偶隨流水去興盡即言歸欲別更攜手重來未有期江
雲浮別酒谿雪灑禪衣遙想松房樹新生東向枝

楊信可

鹿角站阻風

風送洞庭沙維舟隱荻花水枯魚上留秋老燕移家日
暮長河急天寒去路賒故鄉三十驛歸夢繞天涯

薩都拉

送景南序上人歸江西

登高傷遠別鴻雁幾行飛
萬木江頭落一僧船上歸
故山秋嶂遠殘日晚鐘微
亦有同袍者多應候竹扉

偕趙逢吉避暑石頭城
日暮余歸逢吉留宿山
中次日寄逢吉并長老珪白巖

竹下一僧坐城頭
獨客還星河下平地
風露滿空山犬吠
松林外燈明石壁間
故人借禪榻心共白雲閑

九月七日舟次寶應縣雨中與天與弟別

解纜不忍發船頭雨濕衣汝兄猶是客吾弟獨先歸行
役關河遠虛名骨肉稀如何淮上雁不作一行飛

送南臺從事劉子謙之遼東

往復一萬里嗟君已兩行朔風吹野草寒日下邊城策
馬犯霜雪逢人問路程歸期在何日應是近新正

登烏石山仁王寺橫山閣

千尺青蓮座煙霞擁地靈山川幾納屐日月兩浮萍鳥

沒天垂海龍歸水在瓶深堂說法夜應有石頭聽

寄石民瞻

京口石彭澤詩懷似鶴形蒼天容老健白髮照江清夜
鼎薰雞舌秋袍織鳳翎醉扶綠玉杖應望石頭城

題舊縣驛

高樹日停午斜飛燕子風一身千里外孤館萬山中作
客辭家久間人問歲豐村村桑柘柳羸馬厭西東

寄王御史

御史傳天語飛霜到海垠
浙江潮似雪閩土臘如春
孤客見明月亂山愁遠人
何時動歸興家有白頭親

遊梅仙山和唐人韻

絕頂尋仙跡寒泉照病容
棲鸞多種竹愛鶴莫移松
丹藥人來乞山旂手自舂
秋深霜葉滿麋鹿日相逢

題北固山無傳上人小樓

甕城春寂寂石磴草斑斑
倚杖高低月登樓遠近山
百年詩句裏三國酒杯間
自歎黃塵客來消半日閑

正覺寺晚歸贈益山長老

粥魚聲已罷日暮掩柴扉送客月在地出山雲滿衣燈
明聞犬吠松暗見螢飛深夜長廊靜多應獨自歸

宿因勝莊

竹院亦幽雅參禪愧未能夢回僧枕雨花落佛龕燈風
響過牆竹窗搖挂樹藤裁詩題素壁聊爾記吾曾

宿龍潭寺

倦遊借禪榻客意稍從容落日江船鼓孤燈野寺鐘竹

雞啼雨過山白帶雲春半夜波濤作長潭起臥龍

江館寫事

晚市人煙合歸帆帶夕陽青山到江盡白鳥去天長越
女能淮語吳姬學楚妝棲遲未歸客猶著錦衣裳

訪石城白巖上人

石頭城上暝紅葉雨紛紛半日不見路四山都是雲魚
龍隨水上鐘磬隔林聞遙想南峰叟天寒補衲裙

謝龍江虛白上人雨中見過

山僧入城市歸路晚沈沈雨濕緇衣重燈明黑樹深泥
途信行脚粥鼓急歸心應到松窗下新詩翦燭吟

用韻寄龍江

之子金山去梅天霧氣沈海風吹浪急江雨入樓深火
盡無茶味更長過燭心明朝好晴色應是寄新吟

過采石驛

客路青山外鄉心落照邊潤煙浮野樹涼雨過淮天水
調誰家笛江帆何處船蛾眉臺上月今晚照孤眠

和權上人

故人久不見，悵望思遲留。
白雁寒沙月，黃雲老樹秋。
風霜侵客鬢，鼓角入邊愁。
滿目關河興，登臨倦倚樓。

四美亭餞別時雪大作戲贈趙公子

公子青驄馬，追遊十里遙。
風頭雲葉凍，酒面雪花消。
惜別遲回首，何因見舞腰。
君歸金帳暖，無限可憐宵。

送人之浙東

我還京口去，君入浙東遊。
風雨孤舟夜，關河兩鬢秋。
出

江吳水盡接岸楚山稠明日相思處惟登北固樓

病中書懷

欲向江湖去何年理釣蓑城山入樓近鄰竹過牆多春
甕浮紅酒晴天戲白鵝閑門且消病俗吏莫相過

登山亭

山上新亭好紅塵不可侵雨階幽草合風徑落花深野
水浮晴色平田下夕陰城中公子少日日就登臨

野潛堂

高隱有深意情閑直萬金
溪魚鮮作鱠竹筍長成林
鶴有還巢夢雲無出岫心
讀書風雨夜燈火野堂深

途次吳江別高照菴

適意無南北相逢江海邊
鄉關千里外風雨一燈前
呼酒吾同醉論文子獨賢
分襟在今日握手又何年

閩中苦雨

病客如僧懶多寒擁毳裘
三山一夜雨四月滿城秋
海瘴連雲起江潮入市流
釣竿如在手便可上漁舟

觀音勢

棲霞洞

拄杖訪棲霞神仙信有家
聽泉消俗慮拂石看雲花
海內年將暮山中日未斜
何堪驄馬去回首片雲遮

郭囉洛納新

送王公子歸揚州

玉雪王公子歸羈向竹西
水清淮白上天闊海青低
瓊樹春前發烏絲醉後題
何須問勲業名與爾翁齊

賦甘露門送李御史之西臺

惟中

雉觀銀河近天清鼓角空女牆秋色外仙掌月華中雙
闕當關樹高城繞漢宮使君驄馬去按轡立西風

南城詠古

至正十一年八月既望太史宇文公太常危公偕
燕人梁處士九思臨川黃君殷士四明道士王虛
齋新進士朱夢炎與余凡七人聯轡出遊燕城覽
故宮之遺跡凡其城中塔廟樓觀臺榭園亭莫不

徘徊瞻眺拭其殘碑斷柱為之一讀指廢興而論
之余七人者以為人生出處聚散不可常也解后
一日之樂有足惜者豈獨感慨陳迹而已哉各賦
詩以紀其事庶來者有所徵焉河朔外史廼賢序

黃金臺

大悲閣東南
隄臺坊內

落日燕城下高臺草樹秋千金何足惜一士固難求滄
海誰青眼空山盡白頭還憐易河水今古只東流

憫忠閣

高閣秋天迴金仙寶珞齊青山排闥見紫氣隔城迷朱
拱浮雲濕瑯檐落照低因懷百戰士惆悵立層梯

聖安寺

寺有金世宗
章宗二朝篆

蘭若城幽處聯鑣八月來寶華幢蓋合袞冕畫圖開斷
碣蒼苔暗空庭落葉堆飢鳶不避客攫食下生臺

大悲閣

閣勝虞
世南書

閣道連天起丹青飾井幹如何千手眼只著一衣冠金
榜交龍挾瑯甍吻獸攢憑高天萬里白紵不勝寒

鐵牛廟

燕人重東作鎔鐵像牛形角斷苔花碧蹄穿土鏽腥遺蹤傳野老古廟託山靈一酌壺中酒穰穰黍麥青

長春宮

全真立神仙處機之居太祖常召至西域之雪山誦道屢勸上以不殺

羸驂蹋秋日迢遞謁琳宮松子花飄落溪流板閣通樓臺非下土環珮憶高風草昧艱難日神仙第一功

竹林寺

全熙宗駙馬宮也寺僧云一塋無影

城南天尺五祇樹給孤園田第王侯去精藍帝釋尊老

僧誇塔影稚子斲松根何日天台路相從一問源

龍頭觀

龍頭懸三牙籤
刻曰建隆元年

仙館紅塵外龍頭得借看開函雲氣濕近席雨聲寒碧
血凝螺黛香涎逼麝檀牙籤認題字猶是建隆初

妝臺

廢苑鶯花盡荒臺燕麥生韶華如逝水粉黛憶傾城野
菊金鈿小秋潭石鏡清誰憐舊時月曾向日邊明

雙塔

安史開元日千金構塔基世尊寧妄福天道自無私寶
鐸游絲胃銅輪碧蘚停驂指遺跡含憤立多時

白馬廟

祠宇當城角霜蹄刻畫眞房星何日墜駿骨自能神曾
蹴陰山雪思清瀚海塵長疑化龍去騰跼上雲津

萬壽寺

寺有許道
寧畫屏

皇唐開寶構厯劫抵金時絕妙青松障清涼白玉池長
廊秋牖響高閣夜鐘遲獨有乘閑客扶藜讀舊碑

玉虛宮

太道教以供薪水之勞為其張
本宮主張真人其貌甚清古

樓觀迴深巷松枝夾路低
拾薪供早爨抱甕灌春畦
經向琅函讀詩從古鼎題
白鬚張道士送客過桃溪

題吳照磨墨梅

天台吳架閣京下憶尋梅
倚杖月中立思君江上來
夜深憐雪落香動覺春迴
獨坐溪邊石晴雲滿綠苔

王沂

送達兼善僉憲河南

袖有新封事囊無舊賜金
兔園司馬賦魏闕子牟心
秋菊誰同采燕鴻好寄音
故人如問我為誦白頭吟

送蕭九齡赴淮西

漢將傳華胃蘇卿敝黑貂
曳裾非我事置醴遠相招
楚甸春多草淮流日兩潮
空吟小山賦叢桂影蕭蕭

陳旅

艾氏心遠樓

聞子臨川上高樓萬里并
興來時獨立心與目俱行
野

夕歸鴻小溪晴落木明登臨何日共作賦寫平生

送潘澤民還江南詩

并序

檇李潘澤民往歲來京師貴人有好事者延致材
館且太尉薦之而澤民悵焉有庭闈之思遂薦為
行中書從事欲有以悅其親耳夫懷才抱藝之士
莫不欲自見于宰物之地而徘徊淹遲無所遇合
至於窮不能歸羞見其親戚鄉黨者豈少也哉若
澤民之歸亦可以飲酒而歌舞矣雖然明時將廣

碣石之宮拓康莊之第以徠天下之賢雋而登用
之澤民宜無久留于外也乃爲之賦詩曰

之子來京國侯門即曳裾只求毛義掇未獻賈生書野
樹山前合江帆雨外疎故人正相望且莫賦閒居

送海豐劉巡檢

隨牒遊丹徼春風協氣舒蜚丁鳴鼓吹魚吏掌文書浦
嶼煙霞遠村墟瘴癘除石華肥可茹無用膾蜆蛄

送項鍊師還天台

鍊師
能醫

不學東方朔歸尋馬子微人間無藥賣海上有雲飛谷
煖金鵝大溪深土鴨肥當年種桃種高過石樓扉

建昌胡氏小有樓

窈窕麻姑宅登臨憶謝公近間好山色都在小樓中屋
曙丹霞吐城深翠雨通石池正當戶人立藕花風

清漳黃氏北墅

聞說黃家墅開門入翠嵐細岑依舍北流水出城南雨
暖蘭抽筍霜晴樹落柑千年讀書地更莫乞羊曇

送余嘉賓赴常寧州判官

家在洞庭左舟行湘水間
湍流多度竹石聳不依山
野郭看花出州田載稻還
舊聞官事少幽興轉相關

張書巢畫圖

萬里青城叟歸尋江上山
瀑喧春雨過汀暗暮雲還
駐馬白沙曲懷人綠樹間
薊門有巢父幽興最相關

李洞

涉太湖

衆水東南會三江左右通夫差中習戰范蠡此休功
鷗鳥青銅鏡魚龍紫貝宮扁舟嗟未遂蕭散媿漁翁

段天祐

發富陽

遠海初曦動長林積霧開山從吳會起潮向富陽回
野飯松毛火村醪樹瘿杯風吹黃葉度偏傍馬鞍來

發嘉興

明發嘉興縣扁舟宜向東天寒待伴雪日暮打頭風
遠

寺明霞外孤城綠水中等閒作離別不擬見歸鴻

追和唐詢華亭十詠

錄三首

顧亭林

希馮年少日著述此閒居不久登朝去初非與世疎舊
遊何歲月遺跡盡丘墟只有湖千頃春潮漲雨餘

柘湖

湖水綠於染人家半水濱拏舟採山柘舉酒酹波神蘆
荻生新渚潮沙長舊津夕陽漁笛起愁殺未歸人

華亭谷

谷水三百里夜雨向東流
仰瞻崑山樹下汎松江舟
白波兼天起素采與雲浮
遊宦歸來蚤鱸魚正及秋

傅若金

大霧過安慶

水郭浮蛟室雲帆度客星
江空連海白山遠入淮青
訪古聊須到乘流未可停
遙疑天柱曉風霧颭精靈

七夕

耿耿玉京夜迢迢銀漢流影斜
烏鵲樹光隱鳳皇樓雲
錦虛張月星房冷閉秋遙憐
天帝子辛苦曾牽牛

賦得天際舟送兵部張孟功治河

日下行人發春晨去鷁催纜侵斜日解帆向斷雲開度
鳥窺詩卷垂虹映酒杯尋源不可盡奉使幾時回

幽居即事

地僻連高樹庭虛集曉煙
鳥銜朱果落蟲曳碧絲懸扣
戶鳴空盎開渠得古錢
深慙窮巷客時枉故人牋

次孫伯剛鶴雛詩韻

弱羽為人養，卑棲每自歸。
步苔依坐石，窺竹映開扉。
絕島秋雲迴，空庭夕露微。
紛紛野田雀，終日稻梁肥。

寄題余泰亨隱居

聞說幽棲處，遙連郁木天。
徑開移竹地，渠引灌花泉。
坐客留傾釀，鄰人訪草玄。
京華遠遊子，那得共盤旋。

盧溝橋

古道曠秋色，平橋卧夕陽。
水聲西下急，山氣北來長。
數

騎凌空闊孤煙入渺茫人傳耕種地宿昔戰爭場

拒馬河

落日蒼茫裏秋風慷慨多燕雲餘古色易水尚寒波岸
絕船通馬沙交路入河行人悲舊事含憤說荆軻

薩天錫畫屏

入坐聞流水開屏見遠山路通煙樹窈門對野橋閑拄
杖晴俱出漁舟暝獨還祗慙萬里客塵土汙朱顏

延津渡河

驛路南征遠河津曉渡危風雷劃簸蕩雲日互參差鳴
櫓中流急縣帆上泆遲交州却回日應及水清時

金竹道中書題桃花驛

征南萬里使行道畏蹉跎平壤踰淮少青山入楚多田
依深谷轉路迫斷崖過後夜南樓月羈離奈爾何

港口曉行

早起星猶在前行路稍分人家隔樹見山鳥過橋聞澗
響多于雨林昏半是雲曉逢力田者愧爾一朝勤

臨湘

宿雨愁泥滑長途畏日斜黃歸幽徑犢青聚古祠鴉野
屋時依竹山園各種茶巴陵看漸近遙識故人家

柳先生祠

江抱零陵郡山藏鉅鉅潭古人如水去祠樹與天參述
作籠諸子風騷迫二南後來竊時譽吾輩得無慚

賓州

過嶺冬猶熱緣山夜未寧樹殘兵後赭草發燒餘青西

寇迷仙霧南人候使星民居日稀少惟見短長亭

臘日入安南

冬入安南國雲迎使者輶郡聞秦日置柱想漢時標江路
篁猶箝山田稻始苗皇恩涵遠通行役不辭遙

馮高

世祖初開業安南蚤貢琛國蟠蝸角小地接犬牙深使
節猶頻入蠻兵莫見侵數州須拯恤萬感寄登臨

荅別龍州蕭從事韶

使節明金虎背弓偃畫蛇蠻夷趨號令原隰見光華邊
樹猶含綠江梅久放花憶君依幕府何日定還家

還聞柳州破道阻將泝江

交趾方通使賓州忽被圍還聞山路塞徑就水程歸上
府空金碗前軍老鐵衣誰能平政化不事總戎機

別靜江文學諸公

乍見先愁去將行未忍分字期歸後寄歌畏別時聞驛
樹過春雨江船隔夜雲驅馳念吾弟羽翼待諸君

浯溪

槎櫂依江岸尋橋過寺門竹深題字滿苔古刻文昏石
色兼雲冷溪聲雜雨喧吾亭正何處為覓漫郎孫

衡湘驛

烽火連諸郡旌旗轉百蠻野鶯先客至江雁及春還吳
楚青天迴瀟湘白日閑登臨慰懷抱况復近鄉關

長沙見嚴親

遊子方春至嚴親盡日憐別來憂道路喜定問山川百

粵元過嶺三湘總入天歸朝誠努力江上莫留連

金陵晚眺

金陵古形勝晚望思迢遙白日餘孤塔青山見六朝燕
迷花底巷鴉散柳陰橋城下秦淮水年年自落潮

京師守歲

日月催時序乾坤隔晦明殘年萬里夢今夕幾人情久
客煩朋友雙親倚弟兄深慙須薄祿不得謝浮名

發通州

燕騎經旬發吳船此日行樹知風起色帆識雨來聲驟
轉長林暗斜分絕塞明河流今夜滿無復滯歸程

水村

野樹龍蔥合官橋屈曲通入天迷遠近看日得西東酒
旆青搖水漁罾白映空時還問村落何必似城中

河西務

驛路通畿甸教倉俯漕河騎瞻西日去帆聽北風過燕
薊舟車會江淮貢賦多近聞愁米價素食定如何

秦郵

縹緲平湖白微茫遠樹青田分高下水道俯短長亭鵝
鴨煙中亂魚蝦雨裏腥秦郵看漸近城郭記曾經

初歸

遠近趨鄉國中宵夢弟兄松篁數里見桑柘十年成慈
母驚相問鄰兒笑共迎無錢未足恨骨肉慰離情

常寧劉百戶園林

頗愛將軍第幽同處士園石浮春雨翠溪抱夕陽暄虎

轅空懸壁熊車數過門遙疑花樹底雞犬近仙源
少壯從戎事歸休遂野情鶻冠時自著龍劍夜猶鳴竹
下思羊仲瓜前感邵平知君縱幽賞心已薄浮名
春日名園好常時俗客稀樹間斜引徑花外別開扉沙
鳥隨行熟池魚上釣肥往來祇適興出處已忘機

和贈陳與之

午日清江道南風滿白蘋暮年為客健長路對人貧憶
弟餘雙鬢還家稱一身有孫堪慰眼莫厭把杯頻

桃源圖

聞說避秦地
花間忘歲年
偶逢漁父問
長使世人傳
丘壑渾疑幻
林廬或近仙
至今圖畫裏
惆悵武陵船

送雲間師遊浙

杖錫違蕭水
風帆向武林
海紅秋樹遠
江黑暮鐘深
雲起通香氣
潮來合梵音
亦知無住著
隨處得安心

黃清老

與索編修士巖訪馬學士伯庸于蓬萊館因觀

藤花

昔訪蓬萊館春烹芍藥芽重來尋竹逕久坐落藤花君
欲鳴瑤瑟予將拾紫霞鶴吟知雨近留宿白雲家

送人之金陵答贈張質夫

林塘殘月曉松露滴清聲此日佳人別空山碧草生江
湖雙白鳥風雨一啼鶯解纜春花發悠悠萬里情

送歐子歸盱并寄江西諸友

盱水曾游處燕城獨眺時雁來惟我在葉落祇秋知風

雨連今昔江湖重別離送君芳草色千里見相思

晚春過城西

林塘密葉靜禽語綠波翻坐想青雲士幽尋白石村
西山遙下榻芳草欲移軒時有漁樵侶春風載笑言

尋故人

適興一尋君君家在白雲幽花秋後見落葉夜深聞
隨意坐苔石呼童煮澗芹不須談世事詩思正紛紛

留別

相尋復相別把酒意如何雲石有時合風湍無定波此生無出處一笑對嵯峨長揖下山去暮煙浮女蘿

達德越士

雨華臺

漠漠平蕪碧蕭蕭亂葉紅寒衣上危石歌帽立西風日月奔馳外江山感慨中他鄉對零落那放酒杯空

送欽上人遊錢塘

淮南來往熟惟我最相知年少能持律心空不廢詩春

泉閑聽處野寺獨歸時遙想猿啼夜懸燈話所思

于欽

賓日樓

場谷朝迎日丹霞射海樓雲隨華表鶴風送日南舟孤
島煙中樹平波檻外秋凭欄一登眺西北是神州

錦秋亭

蓋齊地溜時般樂諸水匯為馬車瀆以入海博興
宛在水中舟楫交通魚稻成市昔嘗過之愛其風

景絕類江南賦詩亭上云

霜風收綠錦萬頃水雲秋海氣朝成市山光晚對樓舟
車通北闕圖畫入南州且食鱸魚美吾盟在白鷗

張擇

見釣者

宇宙俱為客江湖獨釣翁笛聲吹海月竿影倚秋風天
定行藏拙時清禮法通古今惟范蠡落落幾人同

送人遊廬山

曾到匡廬境巉峯際碧空萬松無路入一水與天通白
鹿眠晴晝猿嘯晚風洪厓如可弔吾亦訪雲中

胡杕

城安驛謾興

驛館停孤棹漁家住隔溪秋天雙隼健寒木一鴉啼雲
色知風起沙痕見水低回看汶上月落在嶧山西

陳鈞

題通真觀

萬木鎖幽寂窗虛夜氣清松風醒酒病蕉雨應棋聲老
子來分榻山人勸避名避名何處去煙浪五湖生

送人還毗陵

久客驚霜鬢還家遂夙心斗城春草合劒井落花深賀
老能吳語莊生變越吟青山多落景為我試登臨

楊鎰

精勤堂

草堂臨水掩煙樹隔雲生曲徑花邊入深燈柳外明春

星垂硯小暮雪撲衣輕暫輟觀書興聽鶯已再鳴

題胡氏墅閣

山近臨溪墅川明背郭樓野煙薰日暗汀雪帶冰流鳥
逐孤雲沒天兼遠水浮主人來往熟投轄為誰留

見月有作

宇宙開塵匣中天白露溥一輪今夜滿四海幾人看霧
泛銀河濕星依玉兔寒素心同浩浩顧景在雲端

酬西竺上人惠茶

香茗天然味真從西竺來葉沈雲景見花破雪痕開有
分思禪榻無心覓酒杯乘風欲歸去時復問蓬萊

岑安卿

次王敬助見寄韻三首

錄二首

琴書曾遠訪訪我海東濱對酒不成醉看花惟惜春青
燈書有味白眼世無人儘有耕桑趣翛然一幸民

祕圖留滯日鄉思已淒淒黃卷挑燈閱紅妝掩鏡啼交
新情僂俛感舊恨低迷語及深知處應憐獨鶴棲

九月三日晚與鄭元秉對坐至日暮小雨後歸
宿偶成

歸人歸未得天際復生陰
小雨濕官道清砧傷客心
蕭肥蘭蕙瘦雀語鳳鸞瘖
坐對滎陽老空懷正始音

夏夜偶成

雨下山雲黑雨收山月明
涼風蚊蚋散活水蚓蛙鳴
露頂中庭坐披衣曲砌行
遙憐荷戈士觸熱入占城

沙縣小樓

半載客延平沙陽夢愈驚蛩鳴深巷靜月昃半樓明故
國三千里歸途一月程西風在庭樹締綌不勝情

寄易禮弟

越客半年住閩溪千里流山高不礙夢日暮易為愁兄
弟終相憶鄉閭非所憂何當先壟側同理釣魚舟

周權

曙巖上人

巖扉人不到竹色滿僧闌林雨添經潤窗雲入硯寒夜

龕猫占卧晨鉢鶴分餐客至無餘事敲冰煮月團

贈別

之子梁園彥才華迴不羣書燈雙鬢雪野飯一犁雲久
病憐為客多愁忍送君鍾山吾舊隱不用勒移文

訪張山民

又攜詩卷出幾度不逢君枯沼肥添雨寒松暖借雲山
窗多樹色石徑老苔紋後夜梅應發清尊擬共分

次韻古琴上人

曳杖雲中寺嵐生古殿陰泉冰冬澗澀山雨夜鐘沈酒
熟村家近梅開野岸深松風千古意留客聽清琴

野趣

地偏居自穩石路接平田雲合茅簷樹雨添花澗泉空
山晴滴翠遠水綠生煙喚酒青林渡斜陽繫客船

僧舍逢故人

空寂禪棲地梵然偶盍簪關河千里道風雨十年心歸
鶴投松暝流螢度竹深絕憐清夜興話舊不成吟

宵征

野路無郵傳迢迢第幾程
天河山外落江月水中行客
久衣偏冷車單馬易驚
前津分曙色依約有農耕

郭外

郭外人家少魚村颺酒旗
江雲低壓樹沙竹細穿籬
地暖梅花早天寒潮信遲
夕陽煙景外倚杖立移時

意行

略約三家市溪迴野路分
輕暝啼竹露宿雨落松雲
山

寺依巖見村春隔鴈聞欣欣農事集聊得狎鷗羣

卜隱次韻

養鈍習成癖居貧道已聞蒲團延客話芋火就僧分林
潤夜疑雨窗寒曙拂雲叢叢牆下菊書暇亦鋤耘

次韻王可道

楚楚山陰彥長遊楚水濱尺書新寄雁十載幾懷人客
夢蘆花雨詩情柳絮春何時歸話舊酤酒薦吳蓴

再次卽本初韻釣臺

羊裘人已遠猶說漢江山不為三公貴輕拋半日閑遺
臺蒼樹杪清瀨白雲灣千載惟鷗鳥相看不厚顏

謹案第四頁後二行玉卮擎雨露刊本擎訛染據
別本元詩改

第十九頁後四行各賦詩以紀其事按迺賢金臺
集詩字下有十有六首四字刊本刪



總校官庶吉士臣侍朝

校對官檢討臣蕭九成

騰錄監生臣周元

騰錄監生臣朱文佐